




DISSERTATIO MEDICA

INAUGURALIS,

DE

DYSENTERIA.



Digitized by the Internet Archive
in 2015

<https://archive.org/details/b22377529>

DISSERTATIO MEDICA
INAUGURALIS,

DE

DYSENTERIA.

QUAM

ANNUENTE SUMMO NUMINE,

Ex Auctoritate Reverendi admodum Viri,

D. GULIELMI ROBERTSON, S.S.T.P.

ACADEMIÆ EDINBURGENÆ Praefecti;

NEC NON

Amplissimi SENATUS ACADEMICI consensu,

Et nobilissimae FACULTATIS MEDICÆ decreto;

PRO GRADU DOCTORIS,

SUMMISQUE IN MEDICINA HONORIBUS AC PRIVILEGIIS

RITE ET LEGITIME CONSEQUENDIS;

Eruditorum examini subijcit

ANDREAS MITCHELL,

BRITANNUS,

LEGIONIS TRIGESIMÆ OCTAVÆ CHIRURGUS.

Ad diem 12. Septembris, hora locoque solitis.

EDINBURGI:

Apud BALFOUR et SMELLIE,

Academiae Typographos.

M,DCC,LXXXIX.

Viro illustrissimo

HENRICO EDUARDO FOX,

Uni e regiis in exercitu Britannico adjutoribus,
Legionis trigesimae octavae tribuno forti et fideli,

E familia Hollandiae nobili nato,

Qui profapiam veterem meritis,

Ingenio, et virtutibus ornat,

Quemque omnes,

Quibus eum novisse contigerit,

Amore et veneratione summis,

Non sine causa quidem gravissima,

Prosequuntur ;

Propter beneficia fere innumera,

Multos per annos,

In sese generose collata,

Hanc dissertationem medicam inauguralem,

Ut monumentum animi haudquaquam ingrati parvulum,

Ea, qua par est, observantia

D. D. CQUE

A U C T O R.

Mr. Don

with best compliments
and wishes

from his friend
and humble servant

The Author

DISSERTATIO MEDICA

INAUGURALIS,

DE

DYSENTERIA.

CUM instituta hujusce academiae celeberrimae utrumque, qui summos in medicina honores attingere velit, aliquod progressus, quem in ea scientia fecerit, specimen in vulgus edere jubeant; quo his, uti decet, obediam, paucis de dysenteria, morbo, quem, dum in castris aliisque, quae milites tenebant, locis, ubi ut complures annos agerem ars, quam profitebar, chirurgica faciebat, grassabatur, videndi et considerandi multae occasiones mihi subministratae fuerunt, differere decrevi.

A

HISTORIA

HISTORIA MORBI.

Hic morbus vere nonnunquam accedere notatur; sed plerumque, sub initium autumnus, in conspectum sese dare incipit, morbos epidemicos, qui aestate praecedente invaluerunt, excipiens, et, donec frigus oriatur hyemale, cum gradatim decedit, manere solens.

Dysenteriam frequenter antecedunt frigoris sensus, horror, plus minusve lassitudinis, capitis, dorsi, lumborumque dolor. Haec mox subsequitur calor adactus. Brevi accedunt tormina non modica, quae modo supra, modo infra umbilicum sentiuntur, desiderio alvum evacuandi stipata, cum ea, quae intestinis comprehenduntur, cum aliquanto inflationis, plerumque excernuntur. Stercus examinatum materiam mucosam, et plerumque plus minusve sanguinis sibi admixtum, habere reperitur. Post pauculas dejectiones, quae evacuantur, ea speciem faeculentam omnino amittunt, liquida evadentia, et colorem profunde flavum subfuscumve sibi adipiscunt; vel materia mucosa sanguine tincta descendit, et aegrotus sanguinem purum nonnunquam excernit. Cum faeculenta evacuantur, scybala, massulae nodive sunt, et eorum excretio nonnihil levationis plerumque affert.

Quo

Quo tempore aegrotus corripitur, eo nausea et vomitione frequenter afficitur, et aliquid biliosum vel subviride rejicitur. Sitis magna subest, et aegrotus saporem amarum in ore sentit. Lingua mucro crasso coloris albi et nonnunquam subflavi obtegitur, et, morbo provecto, saepe nigra et sicca esse reperitur. Appetentia cibi plerumque amittitur, aliquantum inquietudinis accedit, vires prosteruntur, et dejectiones, ne aegrotus somno fruatur, numerosae cavent. Perquam frequenter tormina et excretiones alvinae numerosae sunt signa, quae semet primum ostendunt. Haec brevi excipiunt horrores frigidi, ictus arteriarum celeres, et aliae pyrexiae notae. Quibusdam in exemplis, in breve spatium, antequam morbus invasit, alvus adstricta fuit repleta, et morbum aliquando praecessit plenitudo vel tensio abdominis insolita, borborygmis, ructu, similibusque stipata.

Prout morbus progreditur, aegrotum infestant conamina alvum evacuandi frequentia, inefficacia, et substantiae texturae firmae et compactae, frustula casei adipisve reddentes, una cum corporibus membranosis filamentisve, quae e tunica intestinorum villosa constare nonnulli existimaverunt, interdum excernuntur. Non raro materia pus sanivae, quae ab ulceribus profluat, referens, evacuatur. In summa vero, nisi purgantia adhibeantur, admodum parum eodem tempore excernitur.

Hos

Hos nifus praecedunt et comitantur torminum auctus et tenesmus non parum doloris movens, aegrote sensum habente, quasi intestina comprimerentur, et e corpore exciderent. Tumores haemorrhoidales dolentes aliquando apparent, praesertim in iis, qui haemorrhoidi patent. Quinetiam ani prolapsus, praesertim in pueris, frequenter incidit. Urina cum dolore et difficultate, quae ardor comitatur, saepe excernitur. Cibus ventriculo receptus aliquando dejicitur, non multum in processu concoctionis mutationis passus. Et casus non defuerunt, ubi deglutitio alimenti tormina et tenesmum intulit.

Pulsus arteriarum frequentes, sed raro, nisi morbus in valentes et robustos invadat, vel vere oriatur, pleni durive evadunt. Signa dysenteriae pyrexiaeque comitantis vespere ingravescent; sed mane versus nonnihil remittunt.

Antequam morbus funeste finitur, omnia signa graviora evadunt. Tormina et dejectiones tam frequentes fiunt, ut aegrotus exigua nullave doloris intermissione fruatur. Quae dejiçuntur, ea odorem foetidum, et aliquando intolerandum, emittunt, et saepe sine voluntate excernuntur. Pulsus arteriarum exiles et frequentes fiunt, sitis intoleranda, lingua nigra et sicca. Magna debilitas accedit. His signis adjiciuntur singultus, sudores frigidi, pallor faciei, extremorum frigus, deglutitio difficilis. Aphthae interdum in ore et faucibus, notantur,

notantur, abdomen aliquando tumescit et distenditur, et nonnihil delirii, dolore cessante, ante finem infestum, frequenter accedit.

Pluribus aut paucioribus e signis supra comprehensis substantibus, morbus progreditur, variumque spatium habet, modo aegrotum quatuor aut quinque diebus, modo non ante diem decimum quartum quintumve, et non raro multo serius, rapiens. Sive vero funeste finiatur, sive in valetudinem commodam desinat, maciem et debilitatem insignem nunquam non facit.

Cum dysenteria formam minus gravem, quam quae supra fuit descripta, sibi assumit, omnia signa sunt leniora. Tormina, tenesmus, et excretiones alvinae, minus frequentia sunt. Quae dejiciuntur, ea plus speciei faeculentae et colorem flavum habent. Iisdem quoque non multum sanguinis admiscetur. Excreta odorem minus foetidum habent. Aliquantum appetentiae cibi manet, et parum nauseae et sitis subest. In somnum resicientem interdum illabitur aegrotus. Per hunc, sudatione incidente, et dejectionibus minus numerosis evadentibus, et speciem naturalem sibi gradatim acquirantibus, restituitur, sed vires ei admodum convelluntur.

In uno vel altero morbi statu, cum aliquot dies mansit, tormina, quae, sub initium, majorem abdominis partem occuparunt, regione hypogastrica potissimum circumscribi videntur, parti coli inferiori et recto, ut sedi, ab aegroto relata.

Cum

Cum morbus autumnno semet ostendit, febris, quae eum comitatur, plerumque ad putredinem plus minusve vergit, et formam aliquando remittentem vel intermittentem habet. Per paroxysmos signa dysenteriae propria evidenter ingravescent.

Dysenteriae, postquam aliquamdiu graviter urfit, signa saepe leniuntur. Characteres, qui morbo in statu ejus magis acuto sunt proprii, amittit. Materia mucosa plerumque excernitur, torminibus et tenesmo levioribus stipata. Hoc dysenteriam *chronicam* constituit, quae plerumque longum spatium habet; limites vero dissertationi hujusmodi praescripti me nihil aliud, quam dysenteriam *acutam*, exequi patiuntur.

D I A G N O S I S.

Dysenteria a diarrhoea sequentibus potissimum secer-
nitur; quod in hac nulla pyrexia primaria subest, quod
tormina et tenesmus minus graviter urgent, quodque
major stercoris moles et magis naturalis uno tempore
evacuatur. Praeterea, dejectiones dysenteriae propriae
magis putridae sunt, et sanguini admiscuntur, qui in
diarrhoea raro semet ostendit. Quinetiam, diarrhoea
non, in morem dysenteriae, semet contagione vulgare
notatur. Mihi vero persuasum est, nexum arctissimum
inter

inter duos morbos saepe intercedere, et diarrhoeam, si signa graviora sunt, in dysenteriam veram facile posse converti, praesertim cum diarrhoea a frigore applicato proficiscitur. Posterior, contra, si lenis sit, saepe sub initium speciem diarrhoeae prae se fert.

Ab haemorrhoidae facile distinguitur. Namque in hac, si externa est, tumores circa anum evidentes oriuntur, et, si interna est, dolor parte recti inferiore et lumbis praecipue circumscribitur. Insuper, profusio sanguinis haemorrhoidem manifeste levat, et una cum eo faeces naturales excernuntur.

Dysenteria a cholera differt, quod spatium majus habet, quodque vomitio materiae biliosae ad eam constituendam minime necessaria est. Quinetiam dejectiones cholerae propriae semper largae et copiosae sunt, cum quantitate bilis non parva commiscentur, et raro aliquid sanguinis sibi adjunctum habent. Insuper, parum tenesmi subest. Denique, spasmodica furarum, quae pro signo cholerae pathognomonico habentur, in dysenteria accedere raro notantur.

CAUSÆ REMOTÆ.

Hae autem in SEMINIA et POTESTATES NOCENTES aptissime dividi possunt.

SEMINIA.

SEMINIA.

Mortales ad dysenteriam proclives reddere potest, quodcunque systema universum, et praesertim canalem alimentarium, debilitat. Nonnullas e causis manifestissimis, quae corpus actioni potestatum nocentium opportunum efficiunt, recensere conabor.

Fatigatio nimia, et affectus, qui animum contristant, causis, quae proclivitatem ad hunc morbum dant, jure fuerunt annumerata. Quin posteriores ventriculo et intestinis debilitatem subitanream inferant, ambigi nequit, nihil enim saepe evidentius est. Processum concoctionis repente perturbant, et cibus naturam acidam putridamve sibi brevi acquirit, cardialgiam, ructum, nauseam, et vomitionem faciens. Haec autem mala spatio temporis exiguo oriri saepe notantur, postquam aegrotus viribus affectuum hujuscemodi et dominatui fuit objectus.

Ebriositas idem haud dubie praestat. Quanquam vinum aliique liquores spirituosi, cum modice adhibentur, ad morbum arcendum plane accommodantur, et per stimulum, quo systema nervosum impertiuntur, ut corpus effectibus potestatum nocentium valeat obistere faciunt; experientia quotidiana tamen usum eorundem immodicum systemati universo vires convellere, idque admodum irritabile, et, quod causis levissimis sibi ad-

motis

motis afficiatur, aptissimum reddere, abunde testatur. Haec debilitas autem in ventriculo et canali alimentario, quibus recta applicantur, quorumque functiones igitur potissimum turbantur, evidentius apparet. Saepe quidem notavi, liquoribus spirituosis deditos, frigoris et humiditatis actioni objectos, in morbum facilius, quam alios, incidere periclitari.

Ex hoc, quod morbus in castris, per autumnum, magnopere grassatur, cogi et effici potest, corpora mortalium proclivitatem ad eum, aestate praecedente, singularem sibi comparasse, quae, ut potestates nocentes in ea hoc tempore, quam quolibet alio, potentius efficaciusque agant, facere videtur.

Haec proclivitas in debilitate totius systematis et relaxatione, quantum judicare possum, consistit. Per menses aestivos, corpus humanum calore, qui hisce dominatur, ei constanter applicato, debile et irritabile redditur, qui justo major solida relaxat, et actionem cordis arteriarumque debilitat, proclivitatem ad diathesin putridam procreans. In plagis calidioribus, praesertim aestate, potestates et corporis et animi praeter consuetudinem languescunt, averfatio nisus omnigeni adest, functiones modo abnormi peraguntur naturales, et appetitus plerisque imminuitur. Sitis quoque intenditur, quod partim a stimulo caloris, et partim a materia fluida sanguinis auctu perspirationis dissipata pendere videtur. Hinc insolita humorum aqueorum, qui damna

perspirationis reficiant, in systemate necessitas oritur. Quinetiam processus concoctionis parum aequaliter constanterque perficitur; namque motus canalís alimentarii modo rapidior est, diarrhoeam faciens, modo justo tardior, alvum adstringens.

Insuper, probabile est, cursum humorum mutatum huic debilitati esse fauturum. Namque, mensibus aestivis labentibus, humores cutem partesque exteriores versus copiosius feruntur, distensionem, praeter consuetudinem, vasis cutaneis inferentes. Haec vero in tempus diuturnum manens ea relaxabit, et nimis irritabilia reddet. Excretio e spiraculis cutis adaucta relaxationem hujuscemodi et plenitudinem subesse demonstrat, quae, apud plagas calidiores, tempore aestivo, semet sub forma sudoris copiosi et fluidi, praesertim exercitatione adhibita vel corpore radiis solaribus obiecto, ostendere consuevit.

Ex his modo traditis clare et evidenter apparet, corpus universum, actioni atmosphaerae calidioris, longum in spatium, obiectum, et superficiem ejus potissimum, sensibilitatem morbidam sibi acquirere. Rebus ita se habentibus, promptius, potestate nocente applicata, afficietur, et facilius in morbum incidet.

POTESTATES

POTESTATES NOCENTES.

Quae causa tempestate autumnali, cum dysenteria incipit grassari, frequentissime, meo iudicio, agere videtur, ea est *frigus* corpori noctu applicatum, quod, in regionibus calidioribus, ab aestu diei praecedentis calidissimi plerumque est vicissitudo repentina.

Quanquam hae vicissitudines non semper tantae sunt, quantae thermometer ultra pauculos gradus afficere possunt; effectus tamen, quos in corpus vivum edant, satis manifesti et evidentes esse queunt, magis a vi sensus, quam a tempore ^{et} diminuta, pendentes. Et licet vicissitudo, in tempus brevissimum, tantum maneat; frigus tamen, vi sua adstringente et sedante, in vasa cutanea praeter naturam irritabilia subito agens, et ea spasmus afficiens, conditionem systematis sanguinem circumvehentis ita, ut cursus humorum nimius et morbidus partes interiores versus fiat, mutare periclitatur.

Quinetiam certa, actioni frigoris morbidae auxiliantia, operationem ejus efficaciorum reddere possunt. Calor solaris per diem, ut aer plus humiditatis dissolvere possit, faciet, quae rursus noctu sub forma roris praecipitabitur. Hic autem, apud plagas ad austrum vergentes, copiosissime descendit, et vestimentis retentus,
et

et calore corporeo evaporatus, fons frigoris magnus et actuosus evadit; vel humiditas sub forma pluviae corpori applicari potest, cum iidem effectus edentur.

Humiditas corporis parti admota saepe non minus, quam cum toti ejus superficiei applicatur, nocere videtur. Actio ejus autem, hoc in exemplo, a consensu, qui inter partes systematis diffitas intercedit, pendet, qui artus inferiores inter et intestina perquam insignis est. Quantum frigus hoc modo parti singulari applicatum ad distributionem sanguinis mutandam possit conferre, saepe in primis est notabile. Pedes, exempli gratia, in frigidam demergere pallorem vasis superficiei propriis et contractionem subito infert. Idem quoque praestat frigida cuilibet corporis parti, quae tegi consuevit, affusa. Effectus omnino contrarios edit pediluvium. Vires enim ejus relaxantes in spasmus plurimum possunt, et, ut impetus humorum adauctus partes exteriores versus fiat, evidentissime faciunt.

Insuper, actio harum a calore ad frigus vicissitudinem in systema corporeum multum augeri potest, si vento aërisve fluentis stipantur, quod atmosphaeram calidam, quae corpori circumdatur, eoque sustentatur, fugat et dissipat, et evaporationem ab ejus superficiei adauget, quod ad effectus frigoris intendendos magnopere conferet.

Milites, et cum castris continentur, et cum bellum revera gerunt, multis e causis, quae actioni frigoris morbidam

bidæ amicissimæ sunt, plerumque obijciuntur. Debilitas calore æstivo relaxante illata fatigatione nimia frequenter augetur. Multum detrimenti ab abstinentia longa et inevitabili sæpe capiunt, et pars alimenti præcipua e cibo animali salito non raro conflatur, qui aliquando ad putredinem nimis accedit. Somnus illis raro imperturbatus est. Præterea, usui liquorum spirituosorum immodico magnopere sunt dediti, et ebrii humi, nulla cura adhibita, sæpe decumbunt; morbus homines, qui semet ita gesserunt, sæpe invasit.

Insuper, multa e phaenomenis, quæ morbum comitantur, materiam acrem in corpore progenerari probabile reddunt, quæ per impetum humorum mutatum ad canalem alimentarium deversa, et distensionem subitaneæ et inusitatae vasis illatae auxilians, affectum tunicae intestinorum villosæ inflammatorium, una cum aliis morbi signis, movet. Qualis natura hujusce acrimoniae singularis sit, vel cur in tunicam intestinorum villosam potissimum agat, exponere nequeo. Et eodem modo ratio justa et probabilis reddi non potest, cur materia variolosa, in systema diffusa, cutem potius, quam cava corporis interna, stimulet, et in his, sub forma papularum, semet ostendat. Haec acrimonia, forsitan, quæ ad dysenteriam excitandam confert, est materia perspirabilis, quæ cohibita dotes nocivas sibi acquirit, unde membranam canalis alimentarii sensilem, et vasculis fere innumeris instructam, stimulare valet.

Cum

Cum morbus primum invadit, brevive postea, notae pyrexiae semet ostendunt, quae per totum morbi decursum manent, et impetum humorum morbidum, intestina versus factum, sustentare videntur.

Quae exhalationes a substantiis animalibus vel vegetabilibus putridis oriuntur, eae dysenteriam facere existimatae fuerunt. Caeterum, me iudice, haec effluvia dysenteriam genuinam minus frequenter faciunt, quam plerique auctorum, qui hoc argumentum fuerunt executi, posuerunt. Namque minime compertum habemus, in pellibus animalium putridis subigendis, vel in oleo balaenarum praeparando occupatos, aliosve, quorum est intestina animalium purgare, huic morbo, ante reliquos mortales, patere. Homines tamen huiusmodi atmosphaera, quae vaporibus putridis onusta est, constanter circumdantur. Hisce inductus, non opinari non possum, hosce vapores aliquam mutationem ulteriorem subire oportere, antequam morbum possunt excitare. Quae exempla ab auctoribus memoriae produntur, ea casus tantum diarrhoeae simplicis esse videntur.

Status bilis acris vel vitiatas dysenteriam excitandi, sed sine causa, uti videtur, gravi, fuit insimulatus. Cholera enim acrimoniam, vel quantitatem ejus humoris redundantem, plerumque subsequitur. Haec opinio a specie, quam dejectiones, quae, sub initium morbi, cum bile commiscentur, prae sese ferunt, profecta fuisse videtur.

detur. Cum bilis humor solus coloratus sit, qui in canali alimentario reperiendus est, moles dejectionum ex ea constare posita fuit. Qui vero rem ita sese habere sibi in animum induxerunt, ii admodum decepti fuisse videntur. Namque copiam humoris insolitam ex omnibus vasis secernentibus, quae in canalem alimentarium hiant, effundi probabile est, quae tincturam a materia bilis colorante flavam vel subviridem accipit. Praeterea, experientia docet, hunc humorem, quantitate inusitata secretum, alvum purgare, et intestina contentis suis liberando in dysenteria prodesse.

Dysenteria, cum semel apparuit, plurimos, similia loca tenentes et similes corporis conditiones habentes, eodem tempore corripit. Hinc in castris frequenter grassatur, et multos occidit. Auctores summi iudicii summaequae attentionis, qui morbum per stadia ejus gravissima saepe viderunt, eum contagione vulgari quasi una voce testantur. Et quae illi asseruerint vera esse mihi persuasum est. Morbum vero non semper contagione diffundi, experientia propria doctus, optime novi. Per nuperum, quod in America flagrabat, bellum, meum fuit manum curare, quae castra in loco posuerat, ubi optimum domicilium, quod poterat aegrotis comparari, fuit horreum amplum. Quae anni tempestas labebatur, ea fuit autumnus, et dysenteria militum plurimos graviter exercebat, non paucis aliis morbis eodem tempore semet ostendentibus. Propter necessitatem
universi

universi aegrotantes hoc in aedificio fuerunt collocati, et ab inclementia coeli defensis stragula sufficiebantur. Cavum, ubi alvus evacuaretur, ad aliquam distantiam effossum est, ad quod omnes aegroti, sine ullo discrimine, decurrebant. Morbus vero non semet diffudit. Nulli eorum, quantum meminerim, qui aegrotos nutriebant, et nulli ex aegrotantibus ipsis, qui aliis morbis conflictabantur, in dysenteriam inciderunt; quanquam, hoc tempore, aliquos militum, qui munia in castris obibant, quotidie invadebat. Ipse idem omnino incidere compluries animadverti, et non pauci, quibuscum amicitia mihi intercesserit, in similibus locis eadem notarunt.

Si etiamnum contendatur, dysenteriam primario a contagione semper proficisci, non parum difficile erit exponere, quomodo multis in locis diversis, inter quae nihil commercii intercedit, eodem tempore oriatur, quomodo naves mari, ubi ad contagionem nullo modo potest accedi, frequenter infestet. Quae putrida effluvia hic colliguntur, ea typhum febrimve continuam potissimum movere reperiuntur, et contagio quidem huiusmodi qualibet anni tempestate, si modo quae ortui ejus faveant non desint, progenerari potest. Quantum vero ad dysenteriam attinet, ea, praeterquam in raris exemplis, a vicissitudinibus tempestatis pendere videtur. Si vero a contagione pendeat, haec forsitan tantum,

tantum, certis rebus substantibus, progeneratur, et originem a statu atmosphaerae singulari deducit.

Nautae autem, praesertim intra gradus latitudinis calidiores, eisdem fere caloris et frigoris vicissitudinibus, ac milites, obijciuntur. Dysenteria igitur classes frequenter infestat. Praefecti vero, et mari et terra, qui noxas frigoris et humiditatis vestimentis calidioribus arcere possunt, quibusque vinum cibisque salubris copiosius subministrantur, in eam rarius incidunt. Quinetiam silentio non praetereundum est, eos defatigationi aliisque debilitatis causis, quae proclivitatem ad morbum constituunt, minus obijci solere.

Causis remotis dysenteriae autumnalis tam plene, quam ratio instituti patiebatur, consideratis, paucula de morbo, prout vere in conspectum sese dat, proferre conveniet. Hac anni tempestate quidem minus frequenter invadit.

Sydenhamius immortalis memoriae prodidit, morbos, qui aestate et autumnno semet ostendunt, ad diathesin putridam esse procliviores; eos vero, contra, qui hyeme et vere accedunt, plus inflammationis habere. Qua ratione tempestatem aestivam mortales ad dysenteriam pronos efficere ponam, supra explicare conatus sum.

Temperies aëris, per menses hyemales, plerumque magna ex parte aequalis est, paucisque mutationibus opportuna. Rebus ita se habentibus, frigus, ut vulgo existimatur, sua stimulante et tonica potestate vigorem et

firmitatem corpori insolita comparat, proclivitatem ad diathesin phlogisticam faciens. Caeterum vere, praefertim in plagis calidioribus, eadem frigoris et caloris vicissitudines, ac autumno, incidere consueverunt. Meridies non raro grate calidus est, dum vespere frigidissimus est, et tremores et horrores excitat. Hinc homines aëri nocturno obiecti in eisdem morbos, qui autumno epidemice grassantur, sed non aequo certo, incidere periclitabuntur, quod tonus systematis adauctus impetum humorum ad superficiem rursus vertere saepe valebit. Dysenteria eos potissimum, quibus intestina debilia et irritabilia olim reddiderit, quibusque frigori leviter expositis nonnihil diarrhoeae et tormina superveniant, facillime afficiet. Quae dysenteria vero hoc anni tempore incidit, ea ab autumnali hoc praecipue fecernitur, quod corpora valentiora occupat, et febre inflammationem habente stipatur, quae plus evacuationis e systemate generalis exigit, quam quod in dysenteria autumnali necessarium esse reperitur.

CAUSA PROXIMA.

Haec, me iudice, in affectu tunicae canalis alimentarii villosae inflammatorio potissimum consistere videtur, quem comitatur pyrexia, quae, pro gradu inflammationis

tionis quae subest, magis minusve gravis est. Rem ita sese habere, e causis morbi remotis, quae supra sunt comprehensae, consideratis, sed potissimum e phaenomenis inter cadavera eorum, quos dysenteria extinxerat, incidenda notatis, concludo. In historia omnium, quas memoriae tradiderunt auctores, incisionum, ulcera, erosiones, et notae inflammationis coli rectique praecedentis aut praesentis, nunquam non referuntur. Professor eruditissimus Monroius praeparata numerosa medicinae studiosis exhibenda curat, quae effectus morbi plane ostendunt, et huic argumenti parti non parum luminis offundunt. In nonnullis eorum tunicae crassae, scabrae, et inaequales sunt; in omnibus, tunica villosa multum condensatur, inaequaliter, portionibus non parvis disjunctis, protrusa. Si aer, vel quilibet liquor in vasa immittatur, in cavum per ostia ampla oculisque percipienda, quae examinata vasorum sanguiferorum minime exilium erosiones esse videntur, rursus effunditur. Cum occasiones corpora eorum, quos morbus mature rapuisset, examinandi medicinam remve chirurgicam facientibus fuerunt subministratae, magna pars tunicae intestinorum interioris gangraena aut inflammatione laborare fuit reperta. Testimonio auctorum concordi experientiam propriam adjicere liceat. Viscera multorum, quibus dysenteria exitio fuerat, abdominalia inspexi. Notae autem injuriae loco propriae in colo et recto semet constanter ostenderunt. Modo
formam

formam induratorum, quae ulcera et erosiones comitantur, gesserunt. Modo canalis alimentarii portiones gangraena laborare videbantur. Intestina tenuiora morbo, si partem eorum infimam, quae in caput coli caecum definit, excipias, raro laborarunt. Haec pars ilei quidem colorem praeter consuetudinem rubrum interne habere aliquando reperiatur. Abdomen viri, qui morbo, postquam quatuor decubuerat dies, fuerat extinctus, patefactum est. Superficies interior partis ilei, coli, et recti majoris colorem profunde rubrum habebat, vasa sanguifera sanguine distendebantur, sed ulceratione carebant. Monroius celeberrimus quoque praeparatis clare demonstrat, ileum nonnunquam esse ulceratum. Sedes morbi igitur non colo rectoque solis circumscribitur.

Ex his aliisque historiae morbi propriis attente consideratis, et e torminibus abdomen, cum morbus primum invadit, universum occupantibus, deinde, morbo provectiore, semet parti coli inferiore rectoque continentibus, constare videtur, affectum inflammatorium partem superficiei canalis alimentarii internae majorem prius tenere, deinde, cum morbus aliquamdiu mansit, intestina tenuiora, plerisque in exemplis, relinquere, et amplioribus potissimum semet circumscribere videri. Haec affectus inflammatorii demigratio historiae et definitioni erythematis, prout a viro sagace Culeno traduntur, ex toto convenit. Hunc affectum,
qui

qui tunicam intestinorum villosam invadit, erythematum esse judico ; sed e phaenomenis, quae inter cada-vera incidenda semet in conspectum dant, evidentissime patet, eum frequenter altius penetrare, effusiones in telam cellulosa facientem, quae in suppurationem, frequenterque in maculas gangraenosas desinentes, ulcera et erosiones, quae toties per morbi decursum apparere videntur, progignunt.

Partem causae dysenteriae proximae praecipuam a constrictione coli praeter naturam, vel spasmodica, pendere opinatur Professor eruditus et ingeniosus nuper comprehensus. Verba ejus vero audiamus. ‘ I apprehend, therefore, that the proximate cause of dysentery, or at least the chief part of the proximate cause, consists in a preternatural constriction of the colon, occasioning at the same time those spasmodic efforts which are felt in severe gripings, and which efforts, propagated downwards to the rectum, occasion there the frequent mucous stools and tenesmus *.’ Quantum auxilii a scriptis ejus et praelectionibus deduxerim, et in hoc et in aliis argumentis, et quam liberaliter e doctrinis ejus fuerim mutuatus, hic lubens confitear oportet; sed, pace viri, quem summo et meritissimo honore semper prosequar, scientia ingenioque eminentissimis jure nobilitati, ab hac opinione non dissentire non possum.

Eodem

* Vide First Lines, par. 1078.

Eodem tempore tamen, quantum ex omnibus morbi phaenomenis possit judicari, constrictio spasmodica parti coli rectique inferiori nonnunquam infertur, quae ad morbum, excretionem stercoris liberam praecavendo, sustinendum confert. Haec vero sequela tantum affectus inflammatorii esse videtur, qui actionem tunicae horum intestinorum muscularis adauctum et abnormem, et speciem quoque constrictam, quam, inter cadavera incidenda, nonnunquam, sed non constanter, prae sese ferunt, facit. Nec, cum progenerata est, diu manere, sed interdum tantum humorum secretorum acrimonia, vel scybalorum motu peristaltico in superficiem membranae abrasae impulsorum fricatione excitari, videtur. Et causae eadem eodem tempore, quo constrictionem movent, tormina et tenesmus progignunt. Constrictio autem subesse concessa erosiones, tubercula, speciemque gangraenae, quae in omni morbi exemplo funesto semet constanter ostendunt, minime explicat; quae omnia quidem pro sequelis inflammationis, quae ea haud dubie praecessit, manifeste habenda sunt. Et quidem non improbabile est, plus minusve erosionis et ulcerationis in omni exemplo incidere, ubi sanguis, in spatium temporis etiam modicum, e canali alimentario fuit profusus.

EXPLICATIO

EXPLICATIO SIGNORUM.

Tormina, quae sub initium morbi sentiuntur, ab acrimonia eorum, quae canali alimentario comprehenduntur, membranam ejus villosam irritantium, quae nunc sensilitatem praeter naturam magnam ab inflammatione se infestante sibi adepta est, proficisci videntur. Haec sensilitas autem per materias tenues stercoras mucum naturalem, qui in superficie intestinorum interna, ea ab acrimonia stercoris defendendi consilio, fecernitur, abluentes augebitur.

Aliquantum levationis expulsiōne horum acrium acquiratur, quae, donec secretio adaucta novam colluviei acris accumulationem progenuerit, manebit. Hujus autem acrimonia et moles tormina et dejectiones renovabunt. Si haec signa vero actione spasmodica violenta tunicae intestinorum muscularis stipantur, saepe excitantur; exhalantes arteriae glandulaequae mucosae comprimuntur, et secretio igitur ex iis adaucta movebitur, quae novum humorum stimulantium supplementum praebere perget.

Qui sanguis faecibus dysenteria laborantium admisceatur, is constrictionibus spasmodicis, quae intestinis pernisus alvum evacuandi inferuntur, potissimum est tribuendus

buendus. Haec autem, vasa diversae magnitudinis rum-
pendo, omnem phaenomenorum, quorum in historia
morbi mentio fuit facta, varietatem concitabunt. Cum
vero morbus graviter urfit, et aliquantum inveteravit,
hanc sanguinis profusionem ab ulcerationibus, quae co-
lon rectumque tam frequenter exercere reperiuntur, o-
riri probabile est. Insuper, pus et sanies, quae aliquan-
do excernuntur, ab eodem fonte profiscantur oportet.

Cum colon rectumque, plerisque in casibus, sedes mor-
bi praecipuas esse, et saepe, praeter naturam, constrin-
gi appareat, motum eorum peristalticum quoque non-
nunquam inverti probabile est. Quod si incidit, scy-
bala indurata retinebunt, et parietibus intestini inflam-
mati imprimuntur. Tormina et tenesmus hinc pro-
ficisci non improbabile est, cum aegrotos, post nifus
reiteratos et inefficaces, nihil aliud, quam quantitatem
muci sanguinolenti exiguum, evacuare potest. Quod
veritatem hujusce opinionis firmare et fulcire videtur,
est hoc, quod scybala retenta haec morbi signa movent,
quodque levatio ab usu purgantium derivata quantitati
materiae faeculentae, quae excernitur, pro rata ratione
constanter respondet.

Tenesmus ab irritatione parti recti inferiori per in-
flammationem id occupantem illata pendere videtur.
Haec defectionum dysenteriarum acrimonia, vel moti-
bus a partibus superioribus deorsum propagatis, magna
ex parte, sustentari potest. Hi nifus autem toties rei-
terati

terati prolapsus ani in pueris, et in infirmioribus, facillime progignunt.

Stranguria et dysuria, quae dysenteriam aliquando comitantur, ab eo consensu, qui vesicam uriniferam inter et rectum intercedit, possunt oriri. Namque quaelibet irritatio, alterum viscus afficiens, cum altero facile communicatur; vel affectus inflammatorius ab uno viscere ad alterum potest diffundi.

Opinione admodum discrepauerunt auctores de origine et formatione crustarum membranarum et filamentorum, quae in hoc morbo tam frequenter dejiciuntur, quaeque specie ad tunicam intestinorum intimam tam prope accedunt, ut illa pro hac non pauci habuerint. Naturam eorum modo rationali in praelectionibus suis excellentissimis exponit celeberrimus Monroius. Ea autem a parte sanguinis lymphatica mucoque canalisi alimentarii originem deducere clare evidenterque demonstrat. Haec quantitate inusitata secreta, et in superficiem intestinorum internam effusa, partibus tenuioribus, per lymphatica vasa absorptis, filamenta hujusmodi facile formare posse videntur.

Massae durae specieiue adiposae ex eadem substantia, quanquam sub forma diversa, forsitan conficiuntur, quae formam compactam, in cellulis coli stagnando, ejusque pressurae cedendo, sibi potuit comparare.

Probabile est, faeces non firmam texturam speciemve figuratam ante sibi comparare, quam colon attig-

D

runt.

runt. Cum vero hoc in dysenteria, praeter naturam, saepe constringatur, stercus in cellulis ejus retinebitur, et formam scybalorum vel massarum induratarum sibi acquirat.

Ulcerationes et erosiones, quae in cadaverum incisio-
nibus tam frequenter offenduntur, proficisci putantur
ab inflammatione tunicae villosae semet ad tunicam
nervosam vicinam diffundente, et abscessus ibi forman-
te, qui, licet sub initium exigui sint, ad semet undique
spargendos, ob vim acrium stimulantem, ob stercus in-
duratum illis applicatum, et ob actionem tunicae in-
testini muscularis violentam, paratissimi erunt. Insu-
per, diathesis putrida, quae dysenteriam autumnalem
tam frequenter comitatur, auctui harum erosionum non
parum favebit.

Aphthae, casve reddentia, quae in ore et faucibus, fi-
nem morbi versus, cum exitum infaustum est habitu-
rus, aliquando notantur, indicare videntur, eundem af-
fectum inflammatorium, qui intestina invasit, hasce par-
tes, et oesophagum forsitan quoque totamque superfi-
ciem canalisi alimentarii interiori, occupare. Incisio-
nes vero, quae hanc conjecturam suffulciant, adhuc de-
sunt.

RATIO MEDENDI.

In hac argumenti parte exequenda, eam medendi viam breviter referendam curabo, in quam, plene fusque adhibitam, a me et aliis, cum successu optimo, fuit processum, quamque experientia reiterata efficacissimam esse demonstravit.

Ad quatuor medendi consilia generalia redigi potest.

1. Pyrexiam affectumque tunicae intestinorum villosae inflammatorium depellere.
2. Constrictiones spasmodicas, unde tormina et tenesmus frequenter proficisci videntur, consopire.
3. Superficiem canalis alimentarii internam ab acrimonia eorum, quae secernuntur, defendere.
4. Vires aegroti, per morbi decursum, diaeta idonea sustinere, et ne morbus recidivus fiat cavere.

Cum causâ dysenteriae proxima in affectu tunicae canalis alimentarii villosae inflammatorio consistere ponatur, cumque hic impetu humorum ad viscera abdominis adaucto potissimum excitetur, dum morbus recens, et antequam ulla exulceratio vel erosio orta est, ad ea, quae primo consilio accommodantur, decurrere conveniet. Et quod primum impetum humorum ad
superficiem

superficiem revocandi consilio adhibendum putamus, est emeticum.

Sub initium, et per decursum dysenteriae, functiones ventriculi magnopere perturbantur, et quae eo continentur aliquando acida, sed frequentius putrescentia evadunt, et haec acrimonia superficiei canalis alimentarii sensili admota eandem non stimulare non poterit, et igitur constrictiones spasmodicas ciere periclitabitur.

Vomitionis excitandae ipecacuanha frequenter fuit adhibita. Hoc medicamentum summis laudibus fuit elatum, a quibusdam pro specifico in dysenteria habitum. Boni ejus effectus vero a virtute ejus emetica potissimum pendere videntur, et hac forsitan tartaro emetico cedit, quod dosibus ad nauseam movendam accommodatis adhibitum cursum humorum ad superficiem potenter facit, spasmus febrilem, qui eam tenet, tollendo agens. Et, ob consensum fibras cutis inter et ventriculi intestinorumque proprias intercedentem, spasmus colo rectoque, quae, plerisque in exemplis, sedes morbi sunt, forsitan quoque demet.

Apud plagas calidiores vero, operatio tartari emetici solius violentior esse reperiebatur, et propter debilitatem, quam systemati universo intulit, et potissimum propter perturbationem, qua functiones ventriculi affecit. Namque vomitio, in aliquot dies postea, causis levissimis excitabatur, et alimenta ingesta fermentationem acidam brevi subibant, vel distensionem stomachi
et

et intestinorum flatulentiam dolentem movebant. Igitur ventriculi evacuandi ipecacuanha, portiunculae tartari emetici adjuncta, adhibebatur, quo et vomendi, et cursum humorum ad superficiem faciendi, consiliis inserviebatur. Hoc medicamentum vespere, quo accessioni febrili, quae in dysenteria satis manifesta et evidens est, occurreret, praecipiebatur.

Purgantia adhibita in affectum canalis alimentarii inflammatorium plurimum posse reperiiebantur, et remedia, quae in auxilium morbi promptissima erant, esse videbantur. Potissimum, quantum judicari potuit, scybala indurata, quae, cellulis coli inhaerentia, id magnitudine mechanice stimulant, et irritationem perpetuam reddebant. Laxantia quoque, secretionem ex exhalantibus numerosis, in superficiem tunicae intestinorum villosae diffusis, adauctam facientia, ad actionem eorum morbidam, purgatione alvi peracta, compescendam conferent; vel, organa fecernentia, quae in cavum intestinorum hiant, stimulando, secretionem magis salubrem promovebunt.

Multa purgantia ab auctoribus fuerunt laudata, et omnia eorum, exemplis in diversis, prodesse potuerunt. Quae fructu cum prosperrimo, cum morbum curandum suscipiebam, adhibebantur, ea sales medii fuerunt, et reliquis sal Glauberianum palmam facile praeripuit. Hoc medicamentum purgans, vel quodcunque aliud in usum revocabatur, aegroto mane, postquam emetico fuerat

fuerat usus, datum est, et die, qui sequebatur, secundo repetitum est. Ad idem, ex eodem intervallo, et postea, pro gravitate signorum et violentia, rursus decursum est. Quod praesidii ab illo profluxit, id quantitati scybalorum evacuatae, pro rata ratione semper respondit. Cum morbus vero aliquantum inveteraverat, sales medii repetiti, forsitan ob potestatem eorum sedantem et refrigerantem, debilitatem in canali alimentario substantem intendere videbantur, inflationem abdominis et distensionem dolentem saepe facientes. Hoc tempore igitur pulvis rhabarbari et jalapii in locum eorum sufficiebatur, et votis optime respondebat, dejectiones copiosas plerumque movens

Balneum tepidum est remedium, quod consilio primo convenire videtur; sed, ob debilitatem quam saepe reiteratum necessario facit, aliqua ex parte anceps esse confitear oportet. De effectibus ejus vero, propria experientia doctus, differere nequeo; namque situs incommoda, quibuscum colluctabar, me id adhibere vetuerunt. In multis vero exemplis, fomenta calida magnam levationem attulerunt, et cum quaelibet pars abdominis singularis dolore, qui fixus esse videbatur, affecta est, emplastrum epispasticum sedi ejus superimpositum eum saepe removit.

Quantum *consilium secundum* spectat, constrictiones spasmodicas nempe, unde tormina et tenesmus frequenter proficisci videntur, consopire, opium, per totum dysenteriae

dyssenteriae autumnalis decursum, liberaliter adhibitum est. Ad id tormina, quae intolerabilia saepe fuerunt, levandi causa confugere omnino fuit necessarium. Inter capedinem doloris, in quatuor aut quinque horas, per quas aegrotum miserandum somnus gratissimus reficiebat, comparare consuevit, et hoc modo debilitati, quae in eventu funesto accelerando frequenter multum posse videbatur, occurrendo evidentissime profuit. Si evacuatio intestinorum rite attendebat, nullae noxae usus ejus excipere videbantur. Vespere plerumque, operatione emetici finita, dabatur, vino ipecacuanhae, vel antimoniali, adjunctum. Hae formulae nonnihil humiditatis in superficie corporis excitabant; sed multum sudationis vitabatur, non solum ob debilitatem, quam inferre solebat, sed quod periculum erat ne, ob frigus corpori applicatum, subito cohiberetur, et impetus humorum nimius ad partes corporis interiores rursus fieret. Namque frigus colligere periclitabantur aegroti, dum alvi evacuandae causa e lectis surgebant.

3. Superficiem canalisi alimentarii internam ab acrimonia eorum, quae secernuntur, defendere.

Hoc magna ex parte praestant liquores diluentes liberaliter adhibiti, ii praesertim qui substantias mucilaginosas solutas continent, quales sunt gummi Arabicum, tragacantha, infusum seminis lini, &c. Serum lactis summis laudibus fuit elatum, et, cum acidulum sit, ut antisepticum prodesse potest, excretiones alvinae

per

per vim, quam habet, stimulantem, eodem tempore promovens. Lac ebutyratum quoque, cui infint eadem dotes, proficere valet.

Cum morbus in parte coli inferiore et recto potissimum sedeat, enemata ex oleosis et mucilaginosi confecta plurimum auxilii promittunt, in membranam inflammata, in morem applicatorum topicorum, agentia, et muci naturalis per dejectiones frequentes abluti vicem reddentia. Eorum vero periculum justum nunquam fieri vidi. Nonnullis in exemplis, ubi enemata ex amylo conflata tunicam intestinorum intimam defendendi adhibebantur, nihil commodi inde oriebatur; namque momento fere descendebant, non parum tenesmi eodem tempore moventia. Plus forsitan profuissent opio conjuncta. Hanc rationem hoc medicamentum utilissimum praecipendi, non tantum in dysenteria, sed in aliis etiam intestinorum morbis, commodissimam fore probabile, immo fere certum est. In casu praesente, remedium sedi morbi recta applicatur, et igitur contra spasmodicas constrictiones efficacius erit. Hoc modo praeterea medicamentum adhibendi signa nauseae et anorexiae, et alia ventriculi vitia, defugiuntur, quae usu ejus communi et ordinario fere constanter moventur. In his enematis vero adhibendis, agendum est, ut substantia, quae opio soluto vehendo inserviat, quantitate exigua sit; namque distensio recti, quod in praesentia admodum irritabile est, perquam modica desiderium

fiderium repentinum defidendi, et tenefmum, qui id comitatur, movebit.

Cum acrimonia acida in ventriculo invalescebat, per magnesiā subigebatur, et compositum inde oriens vim leniter purgantem habebat. Si vero morbus jam spatium longius habuerat, et laxitatem intestinis non parvam intulerat, et purgatio non requirebatur, *polio cretacea* magnesiæ anteferebatur. Et interea purgans lenē adhibitum, ne faeces accumularentur, cavebat.

4. Vires aegroti, per morbi decursum, diaeta idonea sustinere, et ne morbus recidivus fiat cavere.

Hoc consilium rite exequi summi momenti est; sed saepe in primis difficile. Substantiae animales, aegrotis cum morbis, quibus aliquid pyrexiae adjunctum est, colluctantibus, forma solida datae, ad putredinem vergunt, et igitur nunquam non devitandae. Eadem forsitan decoctis minus valentibus ex iis confectis, et formam jusculorum gerentibus, objici possunt. Ad ea haud dubie non debet decurri, morbo adhuc recente, aut graviore. Cum vero morbus lenior est, et cum aliquamdiu mansit, haec juscula gelatinosa farinaceis conjuncta partem diaetae aegroti apte constituere possunt. Farinacea per se data fermentationem acidam subire periclitantur; sed hanc proclivitatem decoctis animalibus minus valentibus adjuncta aliqua ex parte amittunt.

E

Morbo

Merbo incipiente, lac caute adhibendum est; sed, aegrotis convalescentibus libere adhiberi potest, et ex oryza hordeove coctum partem diaetae aegrotantium utilem constituit. Cum morbi longitudo aegros debilitavit, et vires corporeae ei succumbere incipiunt, ad vinum, corticem Peruvianum, et usum opii liberalem, decurratur. Haec remedia cum successu prospero saepe dabantur, et frequenter quoque nihil proficiebant. Namque injuriae tunicis intestinorum illatae non raro tales fuerunt, quales medicinae parere recusarunt. Spes nostras usus corticis Peruviani in dysenteria saepe fefellit; namque utilitas ejus bonis effectibus, quos ab eo, aliis in morbis febrilibus, oriri experientia demonstraverit, minime respondit. Adstringentia varia aromatis adjuncta cum fructu adhibebantur, cum status inflammatorius decesserat, et dejectiones, quae adhuc manebant, a statu canalıs alimentarii debilitato, vel a relaxatione excernentium in eundem hiantium, pendere videbantur. Dum vero adhibebantur, duritiei alvi, quam interdum faciebant, laxante leniore in usum revocato, necessarium erat occurrere.

Cum febris dysenteriam comitans remittebat aut intermittebat, quod non rarum fuit, emetica praescribere, et ea, quae canali alimentario continebantur, prius evacuare conveniebat, quam paroxysmos cortice Peruviano sistere sumus conati: Hunc, in exemplis hujusmodi, cum opio conjungere, ne vomitione rejiceretur,

vel

vel celeriter descenderet, necessarium esse reperiatur. In conjunctionibus morborum hoc genus summa, ut vires aegrotantium, quae illis admodum subito convelluntur, rite sustineantur, cura est adhibenda. Intestina eodem tempore libere deplenda. Ratio vero medendi, in quam debet procedi, cum contraria, quod, dysenteria aliis morbis adjuncta, frequenter incidit, videntur indicari, hic locum habere nequeunt.

In plerisque dysenteriae vernae exemplis, quae semet ostendebant, non parum diatheseos phlogisticae dominari repertum est, quam sanguinis detractio pro viribus aegroti aliisque tollere necessarium esse reperiatur. Purgantia salina potissimum indicabantur, et ad opium per primos morbi dies non confugiebatur. Signis inflammationis sublati, curatio reliqua, pro principiis in dysenteria autumnali exequenda propositis, ad finem perducebatur.

Quo morbus non repeteret, quod apud milites, et ob varia incommoda, quibus objiciebantur, et ob summam suam incuriam, incidere admodum periclitabatur, nulla militaria munia, nisi viribus restitutis, noctu obire cogebantur. Pannus laneus, cum potuit comparari, proxime cutem gestus, et tegmina pedum crurumque consuetis numerosiora in reditum morbi plurimum posse reperiabantur.

T I N I S,

1880-1882

Adm.
Chas.



